



ТЕЛЕФОН АРҚЫЛЫ СӨЙЛЕСТІ



Фин тарапының бастамасымен Президент Қасым-Жомарт Тоқаев пен Финляндия Республикасының Президенті Александр Стубб телефон арқылы сөйлесті.

Мемлекеттер басшылары екіжақты ынтымақтастықтың қазіргі жай-күйі мен даму перспективасын талқылап, сауда-экономикалық және мәдени-гуманитарлық байланыстарды одан әрі нығайтуға қос тараптың да бейіл екенін растады.

Екі ел арасындағы қарым-қатынасқа тын серпін беру үшін Финляндия Президенті биыл қазан айында Қазақстанға сапармен келуге дайын екенін жеткізді. Сондай-ақ алдағы кезеге жоспарланған жоғары деңгейдегі келіссөздердің мазмұнын байытудың маңызына назар аударылды. Оның қорытындысы қазақ-фин серіктестігінің жаңа кезеңіне жол ашады.

Сонымен қатар Қасым-Жомарт Тоқаев пен Александр Стубб бірқатар өзекті халықаралық мәселелер бойынша пікір алмасты. Тараптар орнықты дамуды қамтамасыз ету, жаһандық бейбітшілік пен қауіпсіздікті ілгерілету мақсатында көпжақты ұйымдар аясындағы күш-жігерді үйлестірудің маңызын атап өтті.

КӨҢІЛ АЙТТЫ

Президент Қасым-Жомарт Тоқаев әйгілі композитор, «Отырар сазы» ұлт аспаптары академиялық оркестрінің негізін қалаушы Нұрғиса Тілендиевтің жары, белгілі мәдениет қайраткері Дариға Тілендиеваның дүниеден өтуіне байланысты туған-туыстары мен жақындарының қайғысына ортақтасып, көңіл айтты.

ҚҰРЫЛТАЙ ҰЛТТЫҚ ҚҰНДЫЛЫҚТАРДЫ ЖАҢҒЫРТУҒА ЫҚПАЛ ЕТТІ



ҰЛТТЫҚ ҚҰРЫЛТАЙ

Ертең Бурабайда Ұлттық құрылтайдың кезекті отырысы өтеді. Президент Қасым-Жомарт Тоқаевтың төрағалығымен 2022 жылдың маусымында алғаш рет жиналған құрылтай мүшелері биыл төртінші рет бас қосады. Әрине, төрт жылда ротация арқылы Құрылтай мүшелерінің бірқатары алмасты. Төрт жылда Құрылтайда көтерілген көптеген мәселе мемлекеттің қолдауына ие болып, құқықтық базасы қалыптасты. Ел ішіндегі олқылықтарды жоюға бағытталған қадамдар жасалды. Әлі де талай игі бастама көтерілетіні анық.

→ 5



БЮДЖЕТКЕ ҚОЛ САЛУ АЗАЙМАЙ ТҰР

Қарағанды облысында мемлекет қаржысына қол салу азаймай тұр. Ақшаны шенеуніктер де, мемлекет қазынасын пайдаланатын кейбір сервистік компаниялар да иемденіп кеткен. Құзырлы органдар қазына қаржысына қол салғандардың мемлекетке келтірген шығыны миллиондап саналатынын алға тартады.

→ 7

ШЫҒЫСТАҒЫ АЛАМАН



«АМАНАТ» партиясының қолдауымен Шығыс Қазақстан облысы әкімдігі Алтай төрінде жазушы, драматург Қалихан Ысқақтың 90 жылдығына арналған «Қарасөздің қарагері – Қалихан» атты республикалық ақындар айтысын ұйымдастырды.

→ 3

«ЖАСТАРДЫҢ» БАЛАЛАРҒА АРНАҒАН СЫЙЫ

Театр – ең бекзат өнер. Оның туындысы ересектерге ғана арналған деген жеңіл ойдан аулақ болу керек. Өйткені балаларға арналған театрланған қойылымдардың саны да, көрермені де артып, тақырыптың кеңейіп келе жатқаны байқалады. Елдегі барлық дерлік театрдың репертуарында бүлдіршіндерге арналған спектакльдер азды-көпті қойылып келеді. Мәселен, «Ұр, тоқпақ», «Алтын балапан», «Күлше қыз» сияқты төл әдебиетіміз бен шетелдік үздік туындылардың аудармасы кішкентай көрерменнің көзайымына айналған.

→ 8



ЖОҒЫ ТҮГЕЛДЕНБЕГЕН ЖЕТІСУ ТУРИЗМІ

«Жер жәннаты – Жетісу» деген атауының өзі бұл аймақтағы тұмса табиғат пен таңғажайып ортаның ерекшелігін танытса керек. Шынымен, нуы мен суы жарасқан өңір қоршаған ортаның сыйына бай. Демек, облыстағы туризмнің қанат жаюына ешқандай кедергі болмауы тиіс. Алайда дәл қазіргі аймақтағы ахуалға қарап олай деп айту қиын. Өкінішке қарай, Жетісудағы туризмнің жоғы әлі түгелденбей отыр.

→ 7



13 НАУРЫЗ 2025 | БЕЙСЕНБІ



ЫНТЫМАҚТАСТЫҚ МӘСЕЛЕЛЕРІ ТАЛҚЫЛАНДЫ

Парламент Сенатының Төрағасы Мәулен Әшімбаев Францияның Қазақстандағы Төтенше және Өкілетті елшісі Сильван Гиогемен кездесті.

Кездесу барысында Мәулен Әшімбаев дипломатты тағайындаумен құттықтап, Франция Қазақстанның Еуропалық Одақтағы стратегиялық серіктестерінің бірі екенін атап өтті. Сұхбат кезінде екі ел арасындағы байланысты нығайту ісінде мемлекет басшыларының достық қарым-қатынасы елеулі рөл атқаратынын, соның арасында бүгінде көптеген салада маңызды келісімдерге қол жеткізілгені айтылды.

«Қазір Қазақстан мен Франция арасында ең жоғары деңгейде сындарлы саяси диалог қалыптасты. Екі ел Президенттерінің өзара сапарлары мемлекеттеріміздің ынтымақтастығына тын серпін берді. Соның аясында стратегиялық серіктестікті нығайтуға бағытталған Бірлескен декларацияға қол қойылды. Біздің Парламенттің екі палатасында да Франциямен достық топтары жұмыс істейді. Олардың қызметі депутаттар арасындағы ынтымақтастықты арттырудың маңызды тетігі екені анық. Алдағы уақытта жұмыс топтарының әлеуетін белсенді пайдаланған абзал», — деді Мәулен Әшімбаев.

Кездесуде сауда-экономикалық, инвестициялық және инфрақұрылымдық ынтымақтастық мәселелері талқыланды. Тараптар климаттық күн тәртібіне, энергетика саласына, цифрландыру мен жасанды интеллектті дамытуға қатысты бірлескен міндеттерді де белгіледі.

Сонымен қатар Мәулен Әшімбаев Мемлекет басшысы Қасым-Жомарт Тоқаевтың бастамасымен Қазақстанда жүргізіліп жатқан реформаларға тоқталып өтті. Палата Спикері орнықты дамуға, инклюзивті қоғам құруға, рухани дипломатияны ілгерілетуге арналған жобалар жөнінде кеңірек айтып, биыл қыркүйек айында өтетін Әлемдік және дәстүрлі діндер көшбасшыларының «Діндер диалогі: болашақ жолындағы синергия» атты VIII съезіне назар аударды.

Өз кезегінде Сильван Гиогемен Қазақстанның жаһандық сын-қатерлерді еңсеру, әлеуметтік-экономикалық және саяси реформаларды іске асыру жолындағы табандылығын жоғары бағалады. Сондай-ақ ол Парламент Сенатымен екіжақты ынтымақтастықты одан әрі кеңейтуге мүдделі екенін білдірді.

ҮЗДІКТЕР ҚАТАРЫНАН КӨРІНДІ

QS World University Rankings пәндік рейтингі бойынша Л.Гумилев атындағы Еуразия ұлттық университетінің бірқатар білім беру бағдарламасы әлемнің үздік ТОП-200 БББ қатарына енді.

Үздік пәндер қатарында: «Қонақжайлық және демалысты басқару» (топ 101-150), «Археология» (топ 101-150), «Ағылшын тілі мен әдебиеті» (топ 101-150), «Лингвистика» (топ 101-150), «Өнер және гуманитарлық ғылымдар» (153 орын), «Тарих» (топ 201-250) бар.

Сондай-ақ әлемдегі үздік үш жүздікке университеттің «Инженерия және технологиялар» (292-орын) және «Саясат және халықаралық зерттеулер» (250-300) пәндері кірді. Ал үздік 500-ге «Әлеуметтану» (301-350), «Білім» (301-350), «Бизнес және менеджмент» (501-550) білім беру бағдарламалары енді.

ЕҰУ ұсынылған пәндердің жалпы санында оң динамикасын көрсетуді жалғастыруда, бұл биыл 21-ге дейін өсті. Салыстыру үшін айта кел-

тейік, 3 жыл бұрын олардың тек 11 пәні болған, яғни көрсеткіш екі есеге өскен. Биыл ЕҰУ 17 пән және 4 пәндік бағыт бойынша рейтинг зерттеуіне ұсынылды.

Рейтинг бірқатар көрсеткіш, атап айтқанда, академиялық бедел, жұмыс берушінің беделі, дәйексөздер, h-индексі, халықаралық зерттеу желісі бойынша бағаланады.

Биыл алғаш рет ЕҰУ «Жаратылыстану ғылымдары» пәндік бағытына еніп, 455-орынға ие болды. Университет сонымен қатар «Математика» бойынша 501-600 үздік қатарына енді.

Ең үздік пәндер 100-ден сәйкесінше 72 және 68,8 балл жинаған «Қазіргі тілдер» мен «Лингвистика» болды.

К.ЕРКІНҚЫЗЫ



АЗАМАТТАРДЫҢ ӨТІНІШІ – АЙРЫҚША НАЗАРДА

Мәжіліс Төрағасы Ерлан Қошановтың Төрағалығымен жалпы отырыс өтті. Онда депутаттар тұрғын үй-коммуналдық шаруашылық мәселелері бойынша заң жобаларын бірінші оқылымда мақұлдап, акваөсіру туралы заңды ілеспе түзетулерімен екінші оқылымда қабылдады. Сонымен қатар мәжілісмендер биыл қаңтар айында депутаттардың өңірлерге сапары барысында түскен азаматтардың өтініштерін мемлекеттік органдардың қарау қорытындылары туралы Үкіметтің ақпаратын тыңдады.



Премьер-Министрдің орынбасары Ермек Көшербаев депутаттардың өңірлерге жасаған сапары барысында түскен азаматтардың өтініштерін мемлекеттік органдардың қарау қорытындылары туралы баяндады. Ол депутаттардың Үкіметке 700-ге жуық жүйелі проблемалық мәселе жолдағанын атап өтті. Оның көп бөлігі, яғни, 46 пайызы әлеуметтік блокқа қатысты. Бұл — денсаулық сақтау, білім беру, әлеуметтік-енбек саласы және басқалар.

— Тұрғындар көтерген мәселелердің бірі — міндетті әлеуметтік медициналық сақтандыру жүйесі. Халық тарапынан, депутаттар тарапынан біртұрақ сұрақ бар екені бізге мәлім. Үкімет осы жүйені жетілдіру бойынша тиісті заң жобасын әзірлеп, Парламентке енгізді. Түзетулерді қосымша талқылап, Мәжілістегі жұмыс топтары мен комитет отырысында бөлек қарастырамыз, — деді Е.Көшербаев.

Сондай-ақ сайлаушылардан коммуналдық инфрақұрылым, көлік, агроөнеркәсіптік кешен, өнеркәсіп, құрылыс, энергетика, заңнаманы жетілдіру мәселелері бойынша сұрақтар түсті. Өңір тұрғындары тарапынан қойылған сауалдардың 5 пайызы экономикалық даму мен кәсіпкерлікке қатысты.

Мәжіліс Төрағасы Ерлан Қошанов сайлаушылардың талап-тілегін орындау бойынша Үкіметтің ақпаратын тыңдау дәстүрге айналғанын және мұндай жұмыс форматының дұрыстығы дәлелденіп, тиімділігін көрсеткенін айтты.

— Мемлекет басшысы жариялаған «Халық үніне құлақ асатын мемлекеттің» мәні осында. Бүгін біз мемлекеттік органдармен бірге сайлаушылардың өтініштерін қарау нәтижелерін жан-жақты талқыладық. Олардың әрқайсысы ерекше көңіл бөлуді талап етеді. Тек осындай отырыстарда ғана емес, депутаттар мен Үкімет мүшелері күнделікті байланыста болуы қажет деп ойлаймын. Мемлекеттік органдар оларды дереу шешуі қажет, шара қолдануы керек, — деді Е.Қошанов.

Мәжіліс депутаттары мен саяси партиялардың фракциялары азаматтардың өтініштерінің орындалуын ерекше бақылауда ұстайтын болады.

Жалпы отырыс барысында депутаттар тұрғын үй-коммуналдық шаруашылық мәселелері туралы заң жобасы мен «Салық және бюджетке төленетін басқа да міндетті төлемдер туралы» кодекс пен Әкімшілік құқық бұзушылық туралы кодекске енгізілетін ілеспе түзетулерді бірінші оқылымда мақұлдады. Түзету авторларының бірі, жұмыс тобының жетекшісі Екатерина Смышляева заң жобалары тұрғын үй қатынастары мен тұрғын үй-коммуналдық шаруашылық саласындағы қолданыстағы заңнаманы жетілдіруге бағытталғанын айтты.

— Үкімет 2019 жылдан бері жүргізіп келе жатқан тұрғын үй қорын басқару жүйесін реформалау мақсатына жете алмады. Мұның объективті және субъективті себептері бар. Мемлекет басшысы 2023 жылғы сәуірде Үкіметтің кеңейтілген отырысында реформаға шынайы баға беру қажеттігін атап өтті. Осыған байланысты жіберілген қателіктер мен істердің нақты жағдайын ескере отырып, депутаттық корпусқа кондоминиумдарды басқарудың құқықтық негізін қайта қарау тапсырылды. Бұл заң жобасы осы тапсырманы орындау үшін дайындалды, — деді депутат.

Екатерина Смышляеваның айтуынша, заң жобасында кондоминиумды басқарудың екі түрі — мүлік иелерін біріктіру және тікелей бірлескен басқару қарастырылған. Қарапайым серіктестіктер жеке нысан ретінде алынып тасталады, бірақ басқарудың екінші нысаны ретінде іс жүзінде жұмысын жалғастырады. Басқару субъектілері басқарушы компания, кәсіби басқарушы және пәтер иелері кооперативі болады. Бұл ретте пәтер

иелері кооперативі қызметі үшін қайта тіркеуге қойылатын талаптар мен құқық белгілейтін құжаттарды беру тәртібі белгіленеді.

Меншік иелерінің бірлестігіне үйді басқару жөніндегі қызметті өз еркімен жүргізуге құқық беріледі. Тұрғын үй инспекциясының өкілеттігі кеңейтіледі. Ол кәсіби басқарушылардың біліктілік сертификатының болуын және кондоминиум объектісін тіркеуді, сондай-ақ тұрғын үй-жайларды пайдалану нормаларының сақталуын қалағалайтын болады. Құрылыс салушылар бірінші пәтерді сатқаннан кейін кондоминиумды тіркеуге міндетті.

Сонымен қатар тұрғындардың жиналыстарын өткізу тәртібіне, оның ішінде мемлекеттік ақпараттық жүйелер арқылы электронды дауыс беру бөлігіне өзгерістер енгізіледі. Меншік иелерінің бірлестігі төрағасының өкілеттік мерзімі сайланған кезден бастап бір жылдан үш жылға дейін ұзартылады. Сондай-ақ заң жобасы арқылы тұрғындарға есеп бермегені және үйге қажетті құжаттарды беруден бас тартқаны үшін әкімшілік жауапкершілік күшейтіледі.

Мәжіліс екінші оқылымда «Акваөсіру туралы» заңды ілеспе түзетулерімен қабылдап, Сенаттың қарауына жолдады. Жұмыс тобының жетекшісі Сергей Пономаревтің айтуынша, заң акваөсіруді дамыту саласындағы қатынастарды реттейтін құқықтық тетіктерді, сондай-ақ шағын және орта бизнес үшін инвестиция тарту жағдайын жақсартуға бағытталған.

Депутаттардың ұсынысы бойынша жосықсыз акваөсіру субъектілерінің тізілімі енгізіліп, оған енгізілген тұлғаларға су қоймасын жалға алуға бес жылға тыйым салынады. Заң акваөсіру қызметін жүзеге асыруға арналған шартты мерзімінен бұрын бұзу негіздері қарастырылған. Сондай-ақ аквашаруашылық субъектілеріне және оны дамытуға жауапты субъектілерге субсидия беруден бас тарту негіздері, аквашаруашылықты субсидиялау аясында алынған қаражатты қайтару талаптары мен мерзімдеріне қатысты шаралар көрсетілген.

— Сонымен қатар біз балық және балық өнімдерінің көленкелі айналымын жою бойынша нормативтік-құқықтық актілерді, балық және басқа да су жануарларын бақылаудың ақпараттық жүйесінде балық шаруашылығы субъектілерін тіркеуді қарастыратын түзетулер енгіздік, — деді Сергей Пономарев.

Түзетулер балық шаруашылығы саласындағы уәкілетті органның балықтың жаппай қырылу қаупінің алдын алу және оның салдарын жою бойынша көмек көрсету жөніндегі өкілеттіктерін кеңейтеді. Мемлекеттік балық өсіру кәсіпорындары балық өсіру мақсатымен уәкілетті органның немесе оның аумақтық бөлімшесінің шешімімен конкурссыз су айдынын алуға құқылы. Басқа да нормативтік-құқықтық актілер, соның ішінде Экология және табиғи ресурстар және Ауыл шаруашылығы министрліктері арасындағы құқықтық оқпалықтарды жоюға және өкілеттіктерді бөлуге арналған нормалар қарастырылған.

Депутаттар жалпы отырыс барысында Жоғарғы аудиторлық палата мүшелігіне Рахымжан Ділдаевтың кандидатурасын келісті.

Мәжіліс комитеттері жана заң жобаларын жұмысқа қабылдады. Олар: міндетті әлеуметтік медициналық сақтандыру мәселелері туралы; 2017 жылғы 11 сәуірдегі Еуразиялық экономикалық одақтың Кеден кодексі туралы шартқа өзгерістер енгізу туралы хаттаманы ратификациялау туралы; Еуразиялық экономикалық одақтың кедендік аумағынан әкетілетін тауарлардың шығарылған жерін айқындаудың үйлестірілген жүйесі туралы келісімді ратификациялау туралы заң жобалары.

М.ЖАСЫН

